



Broj: T18 0 KT 0015574 21

Brčko, 15. novembar 2021. godine

**OSNOVNI SUD
BRČKO DISTRIKTA BIH**

Na osnovu člana 35. stav (2) tačka i) i člana 226. stav (1) Zakona o krivičnom postupku Brčko distrikta BiH, p o d i ž e m:

O P T U Ž N I C U

Protiv:

KOKANOVIĆ NIKOLE ... rođen ..1999. godine u Bijeljini ...

Što je:

1. Krajem maja mjeseca 2021. godine, u Brčkom, svjestan i sa namjerom da izazove opasnost za imovinu većeg obima podmetanjem požara na vozilu vlasništvo Vojnović Uroša, a sve zbog političkih neslaganja njegovog oca K.Z. i Vojnović Uroša, od Trifković Nedeljka tražio da zapali njegovo vozilo, a za što mu je ponudio 500,00 KM, na što je Trifković Nedeljko pristao, pa je tako Nedeljka odvezao do porodične kuće gdje Uroš stanuje, u ulicu ... broj 50 i pokazao mu vozilo marke "Kia Fortage" registarskih oznaka ... vrijednosti od 35.468,55 KM, nakon čega je Trifković prethodno od G.N. nabavio benzin koji je nasuo u bocu i dana 29. maja 2021. godine, oko 02,00 sata, došao ispred dvorišta kuće Vojnović Uroša, gdje je na trotoaru bilo parkirano njegovo vozilo, a zatim po prednjem dijelu vozila posuo benzin i isto zapalio, usljed čega je došlo do izbijanja požara i oštećenja vozila u smislu totalne štete koja iznosi 31.460,60 KM, a nakon čega se udaljio sa lica mjesta i o svemu izvijestio Nikolu Kokanovića sa kojim se sutradan sastao i koji mu je predao 500,00 KM na ime izvršenog djela,

dakle, drugog sa umišljajem podstrekao da požarom izazove opasnost za imovinu većeg obima,

2. Nakon što je u mjesecu junu 2021. godine, u Brčkom, posudio novac malodobnom M.N. u iznosu od 800,00 KM, koje dugovanje N. nije bio u mogućnosti vratiti u okviru mjesec dana, svjestan te činjenice, iskorištavajući N. obavezu, te svjestan i sa namjerom da izazove opasnost za imovinu većeg obima podmetanjem požara, tražio od N. da zapali vozilo Perendija Milenka i tako otplati svoje dugovanje prema njemu, na što je N. pristao, pa se tako dana 14. jula 2021. godine sastao se M.N. kod Osnovne škole "Jelenka Vočkić" gdje mu je dao uputu da treba zapaliti vozilo marke „Audi A6“ registarskih oznaka posljednja tri broja "400" i predao mu jednu plastičnu bocu za vodu od 1,5 litar, naljepnice Rosa, u kojoj se nalazila zapaljiva tečnost benzin, koju je N. uzeo, te dana 15. jula 2021. godine, oko 03,15 sati, otišao u ulicu 8. Marta u Brčkom, gdje je ispred dječije igraonice "Čarolija" bilo parkirano putničko motorno vozilo marke „Audi A6“ registarskih oznaka ... vlasništvo Perendija Milenka, vrijednosti od 61.447,40 KM, te posuo zapaljivu tečnost benzin po zadnjem dijelu vozila koje je potom zapalio upaljačem, usljed čega je došlo do izbijanja požara i oštećenja vozila čija šteta iznosi 26.230,77 KM, nakon čega se udaljio sa lica mjesta i o svemu izvijestio Nikolu Kokanovića sa kojim se sutradan sastao u naselju Stolin kada mu je Nikola potvrdio da je time "otkvitao" dugovanje koje je imao prema njemu,

dakle, drugog sa umišljajem podstrekao da požarom izazove opasnost za imovinu većeg obima,

3. Dana 16. avgusta 2021. godine, u Brčkom, vozilom marke „Audi Q7“ došao po M.N. ispred marketa „CM“, te svjestan i sa namjerom da izazove opasnost za imovinu većeg obima bacanjem eksplozivne naprave na ugostiteljski objekat „Dos Manos“, kojim upravljaju V.S. i M.B., a koji se nalazi u ulici R. Dž. Čauševića, od N. zahtijevao da baci bombu za što mu je ponudio 1.000,00 KM, na što je N. pristao, pa mu je tako pokazao ugostiteljski objekat, putanju kojom se treba kretati nakon izvršenja krivičnog djela, mjesto gdje se treba sakriti i sačekati ga, te mu istog dana u ulici Mladena Maglova predao jednu ručnu bombu M 52 sa udarnim upaljačem sa kašikom, koju je N. preuzeo, te dana 17. avgusta 2021. godine, oko 01:50 sati, iz pravca gradskog stadiona „Jedinstvo“ došao do ulice R. Dž. Čauševića broj 52, u Brčkom i aktivirao ručnu bombu M52 bacajući je u unutrašnjost vanjskog dijela bašte ugostiteljskog objekta „Dos Manos“, čija je procijenjena vrijednost kompletnog ugostiteljskog objekta 94.645,00 KM, koja je potom eksplodirala, te nanijela znatna oštećenja inventara, staklenih površina bašte koje su razdvajale unutrašnji i vanjski dio, rashladne vitrine, znatna oštećenja unutar lokala koja šteta iznosi 2.351,07 KM, putničkog motornog vozila marke „Škoda Felicija“, registarskih oznaka ..., vlasništvo I.I., koje je bilo parkirano u blizini ugostiteljskog objekta, oštećenja prozora na stambenoj zgradi preko puta ugostiteljskog objekta u prizemlju u ulici Dražena Petrovića broj 2, a koja sva oštećenja su nastala rasprskavanjem eksplozivne naprave i dejstvom gelera iste, dok je izazvao i opasnost za život ljudi koji su nastanjeni unutar stambene zgrade ugostiteljskog objekta i to na prvom spratu, stanara K.E. i stanarke stambene zgrade preko puta ugostiteljskog objekta u prizemlju u ulici Dražena Petrovića broj 2, D.R., gdje je geler načinio oštećenja i prošao kroz prozor prostorije u kojoj je ona spavala, o čemu je N. izvijestio Nikolu Kokanovića, koji mu je na ime "odrađenog posla" posredstvom Š.O. poslao novac u iznosu od ukupno 400,00 eura, koji mu je Š. predao u dva navrata u iznosima od po 200,00 eura,

dakle, drugog sa umišljajem podstrekao da požarom izazove opasnost za život ljudi i imovinu većeg obima,

4. Dana 16. avgusta 2021. godine, u Brčkom, svjestan da je građanima zabranjeno nabavljanje i posjedovanje eksplozivnih materija, neovlašteno nabavio i držao ručnu bombu M 52 sa udarnim upaljačem sa kašikom, koja se svrstava u oružje kategorije A iz člana 6. tačka a) alineja 6) Zakona o oružju i municiji Brčko distrikta BiH, čije nabavljanje i držanje je građanima zabranjeno članom 7. stav 1. tačka a) alineja 1) istog zakona, a koju eksplozivnu napravu je predao N.M., koji je onda po njegovim uputama tu bombu aktivirao i bacio u unutrašnjost vanjskog dijela bašte ugostiteljskog objekta „Dos Manos“ u naselju Kolobara u Brčkom,

dakle, neovlašteno nabavio i držao eksplozivne materije čija nabavka građanima uopšte nije dozvoljena,

čime je pod tačkama 1., 2. i 3. optužnice učinio produženo krivično djelo **izazivanje opšte opasnosti** iz člana 317. stav 1. Krivičnog zakona Brčko distrikta BiH u vezi sa članovima 32. i 55. istog zakona, a pod tačkom 4. optužnice krivično djelo **Nedozvoljeno držanje oružja ili eksplozivnih materija** iz člana 365. stav 1. Krivičnog zakona Brčko distrikta BiH.

II Na osnovu člana 35. stav (2) tačka k) i člana 137. Zakona o krivičnom postupku Brčko distrikta BiH, Tužilaštvo Brčko distrikta BiH podnosi prijedlog da se prema optuženom Kokanović Nikoli, sukladno odredbi člana 132. stav (1) tačka c) Zakona o krivičnom postupku Brčko distrikta BiH, produži pritvor jer naročite okolnosti opravdavaju bojazan da će ponoviti krivično djelo, a za to krivično djelo se može izreći kazna zatvora tri godine ili teža kazna.

Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica
